

## Mshindi Dhidi ya Mamlaka ya Giza

*Lakini mimi, hasha, nisione fahari juu ya kitu cho chote ila msalaba wa Bwana wetu Yesu Kristo, ambao kwa huo ulimwengu umesulibishwa kwangu, na mimi kwa ulimwengu—Wagalatia 6:14.*

**Y**esu aliacha nafasi Yake katika nyua za mbinguni, na kuja duniani humu ili kuishi maisha ya mwanadamu. Alitoa kafara hii ili kwamba aoneshe kwamba madai ya Shetani dhidi ya Mungu ni uongo—kwamba inawezekana kwa mwanadamu kutii sheria za ufalme wa Mungu. Akiwa sawa na Baba, akiheshimiwa na kuabudiwa na malaika, Kristo alijinyenyesha Mwenyewe kwa niaba yetu, na kuja duniani ili kuishi maisha ya hali ya chini na umaskini—ili kuwa mtu wa huzuni nyingi na ajuaye sikitiko. bado chapa ya Uungu ilikuwa juu ya ubinadamu Wake. Alikuwa akiwa Mwalimu ajuaye mambo ya Mungu, ili kuwainua wanadamu, na kuongeza ufanisi wao wa kimwili, kiakili na kiroho.

Hakuna mtu anayeweza kuelezea siri ya kufanyika mwili kwa Yesu. Lakini tunajua kuwa Alikuwa katika dunia hii na kuishi kama mwanadamu miongoni mwa wanadamu. Mwanadamu Kristo Yesu hakuwa Bwana Mungu Mwenyezi, na bado Yesu na Baba ni mmoja. Mungu Mwenyezi hakupungua chini ya mateso makali ya Kalvari, bado ni kweli kwamba “Mungu aliupenda ulimwengu, hata akamtoa Mwanawe pekee, ili kila mtu amwaminiye asipotee, bali awe na uzima wa milele.”

Katika kila njia iliyowezekana Shetani alitafuta kumzuia Yesu asikue katika maisha makamilifu ya utotoni, utu uzima usio na uovu, huduma takatifu, na kafara isiyo na dosari. Lakini alishindwa. Hakuweza kumwongoza Yesu kutenda dhambi. Hakuweza kumkatisha tamaa, wala kumsogeza mbali na kazi ambayo alikuja kuifanya katika ulimwengu huu. Toka jangwani hadi Kalvari tufani ya ghadhabu ya Shetani ilimwangukia Yesu, lakini kadiri ilivyomwangukia bila huruma, ndivyo ambavyo Mwana wa Mungu alizidi kushikilia mkono wa Baba Yake, na kuendelea kwa bidii katika njia iliyojawa na damu (The S.D.A. Bible Commentary, Ellen G. White Comments, vol. 5, 1129, 1130).

Yesu alisulubiwa, na katika kufa Kwake mamlaka ya Shetani ilionekana kushinda. Lakini hata akiwa msalabani Mwokozi alipopaza sauti, “Mungu wangu, Mungu wangu, mbona umeniacha?” Alikuwa ni mshindi dhidi ya mamlaka ya giza. Maneno “Imekwisha,” yalipotoka kwenye midomo Yake iliyokwajuka, itetemekayo, giza kama giza la usiku wa manane lilificha maumivu makali ya kufa Kwake ili wasiyaone wale watazamaji. Kwa muda wa saa nyingi za uchungu Alikuwa ametazamwa na umati wa watu wenye mzaha. Sasa alifichwa kwa rehema na vazi la Mungu.

Wakati wa kifo Chake, kulikuwa na tetemeko la ardhi kali sana. Watu walitikiswa pamoja kwa mrundikano. Mkanganyiko na hofu na mshangao mkubwa ukatokea.... Uumbaji ukaonekana kutikisika kama chembechembe. Ilikuwa ni kana kwamba asili yenyewe ilikuwa ikilalamika juu ya mauaji ya Mwana wa Mungu.

Kifo cha Yesu pale msalabani kililipa fidia kwa ajili ya kila mwanadamu. Wote wanaweza kushinda, kwa sababu Yesu alikuwa amefanya upatanisho kwa ajili ya dhambi za ulimwengu wote. Anawapatia wote nguvu ya neema iokoayo (Manuscript 140, 1903).